

Lajčák se sastao sa budućim šefom Misije OSCE-a u Bosni i Hercegovini



OSCE i dalje igra značajnu ulogu u pružanju podrške naporima BiH u osiguranju stabilne, mirne i demokratske budućnosti za sve njene građane, izjavio je visoki predstavnik i specijalni predstavnik EU, Miroslav Lajčák, na prvom sastanku sa budućim šefom Misije OSCE-a u Bosni i Hercegovini, Garyjem Robbinsem, održanom danas u Sarajevu.

Lajčák je naglasio da mandat OSCE-a u Bosni i Hercegovini obuhvata mnoga pitanja koja su od velikog značaja za građane BiH, kao što su obrazovanje, unapređenje lokalne uprave i učešće civilnog društva u javnom životu.

“U toku javnih debata koje je nedavno organizirao moj ured u cijeloj zemlji, učesnici iz raznih sfera života tražili su više odgovornosti izabranih dužnosnika, bolju zaštitu njihovih prava i unapređenje vladavine zakona. Mladi ljudi su veoma žarko i artikulirano tražili jednaku dostupnost i standarde, te bolji kvalitet i okončanje svih vidova diskriminacije u obrazovanju”, rekao je Lajčák. “OSCE igra važnu ulogu u pružanju pomoći lokalnim institucijama u rješavanju ovih pitanja”.

Budući da je diskriminacija i dalje prisutna u obrazovnom sistemu Bosne i Hercegovine, Lajčák i Robbins su također naglasili potrebu eliminiranja svih vidova diskriminacije iz

škola i univerziteta u BiH i sagledavanja obrazovanja iz perspektive ljudskih prava.